

COMUNICATO n. 2143 del 21/08/2024

Traduzione in mòcheno

En Europeische Forum va Alpach de artifizial intelligenz, moglechkaitn ont pfèrlechkaitn

[Mòcheno] En To van Tirol, as der se en sunta af de 18 van agest kan Europeische Forum va Alpach (EFA) gahòltn hòt, ist klòfft kemmen va bos as trong hòt de artifizial intelligenz (AI). No de innbaich ont en vaiertrèff pet en president van Euregio ont va de Autonome Provinz va Poazn, Arno Kompatscher, der kapitan van Tirol, Anton Mattle, der president va de Autonome Provinz va Trea't Maurizio Fugatti ont der president van EFA Andreas Treichl, ist kemmen der Euregio Summit kan Kongresszentrum va Alpach. De auskennlait hom diskutiart va etisn temen, va sicherkait ont van effekt avn zòmlem ont va abia as de AI praucht kemmen mu en de òllgamo'a'mministrazionien. Òlla moa'n s glaiche: de AI hòt schoa' iaz an konkretn effèkt iber de gamoa'schòft, de birtschòft ont de etik. De derstellt a moglechkait ver en Euregio, ober de miast kritesch tschatzt kemmen ont trong kemmen keing an rèchtn rif pet en nogea' en auskennlait ont en de international standard.

“De artifizial intelligenz mu u'ganommen kemmen pet an groasn kummer oder pet echtn vrait. Der peiste be ist en de mitt”, hòt tsòk Kompatscher. “De AI mu s inser lem verpersern ont problemen ausleischn as men nou nèt kennt. Tea' lai song “ber barn sechen” meichet ober pfèrlech sai' avai de kòlt logik va de AI lòk nèt plòtz en de kompromessn. Ber miasn anoleing klora richtungen ont de mentschleche sait nia vergèssn”.

Der president Fugatti en sai' gruas hòt unterstrichen as en Alpach “tuat men klòffen va tròcht ont vernaiekait ont de temen klòffen va oa'nekait zbischn de drai lender”. Iber en tema van trèff van sèll to der president hòt tsòk: “Abia an iata naiekait de artifizial intelligenz trok mit vrogn va mearer schòrt, moglechkaitn ont pfèrlechkaitn, ont ver za verstea' sa am peistn, an iatn van ins - stòttkearn, bèkn, òllgamo'a'mministrazionien - ist gariart za kennen sa ont za verstea' sa. En Trentin de untersuach iber en de AI ist vour viarsk jor u'pfònk, hinten a groasa bett as hait va de Fondazione Bruno Kessler envirtrong kimm, asou za kemmen araus abia eppes va konkret as dinst gem en de bèlt va de lòntschòft ont van bèkn. I pin gabiss as de insertn lender, krefteg van sai'na kompetenzn, barn arausnemmen kennen de moglechkait as de doi naikait en de mentschhait trok ont barn schaug en de zukunft pet a naia lust”.

Der kapitan Mattle hòt gadenk as “ver za mòchen sicher der prauch va de AI men miast vourhòlten etische gadenk ont van zòmlem ont men miast de mogleche problemen vinnen. Ober men miast der korasch aa hom za òrmen de doi nai teknologi, as plaim bart ont nèt verschbinden, ont za prauchen sa ver de insertn neat”.

Der To van Tirol hòt der u'vong gem en EuregioLab: en de ta as kemmen, barn klòffen iber en prauch va de AI en Euregio, kan a zboa'sk auskennlait.

Letratdinst ont pilder kuriart van Euregio

Download van pilder ont van vrogn [do](#)

<https://www.youtube.com/watch?v=uHXQ-GvZV1Y>

<https://www.youtube.com/watch?v=FrEf9hCT32c>

Ibersetz gamòcht van Sprochtirl va de Tolgamoaschòft Hoa Valzegu' ont Bersntol

(cdt)